

四庫全書

集部

# 欽定四庫全書

集部

皇甫司勳集卷二十九至三十五

詳校官監察御史<sub>臣</sub>曹坦

中書<sub>臣</sub>劉源溥覆勘

總校官進士<sub>臣</sub>朱鈐

校對官檢討<sub>臣</sub>李鼎元

騰錄監生<sub>臣</sub>唐張翊

欽定四庫全書

皇甫司勳集卷二十九

明

皇甫汈 撰

七言律詩

秋興

滇中別去二年多海上歸來未息波  
借箸何由聞妙算輸金豈合許求和  
不堪郊壘生荆棘且喜山居有薜蘿  
莫訝少陵秋易感詩成底是詠兵戈

簡文待詔

寂寞山居興自寬  
厭聞海上有波瀾  
蛩鳴北戶秋聲起  
鵲守南枝夜影安  
老至相如猶抱病  
歸來陶令已辭官  
點蒼山色渾能記  
欲乞丹青作障看

虎丘送趙司空

虎丘締賞逢初地  
麟閣圖勲慶此筵  
已見兵威銷草木  
更看喜氣滿山川  
諸天香梵畱清嘯  
子夜吳歌當凱旋  
自媿陳琳老書記  
欲從幕下賦燕然

子約好談玄理嘗養一鶴每清宵喚徹余齋偶獲  
其匹賦詩識喜屬余和焉

蘇耽雅好應誰似日對仙禽絕世氛行傍瑤琴聊獨引  
飛來緱嶺忽成羣雪中弄影時同舞月下和鳴幾處聞  
覽物與君渾念昔乘軒曾亦濫機雲

贈胡開府

平戎今代推司馬屢奏飛書達漢家雪後三軍蒙挾纊  
月明千里聽吹笳周瑜旌節屯江左王濬樓船出海涯

聞道西湖罷歌舞春來依舊見繁華

送周子顥總憲入蜀昔督學茲省

巴江雪後迴春水遙見揚帆逐楚雲  
花發錦城多藻思猿啼巫峽奈愁聞  
節宣番部新持法門引諸生舊論文  
最是羲之心戀蜀裁書時欲訪周君

寄嚴左相

平津開閣直城東門遠雲天豈易通  
政治古來推魏相文章今復見燕公  
蒲車特賜因優老彤矢先頒為報功

聞說邊疆頻奏捷也知神算自帷中

寄許中丞

馬上相逢關右使袖中因出隴頭書功高自乞還私第  
道遠猶煩問索居涕淚吳臺仍走鹿傳言秦地半為魚  
年來無限蒼生恨總臥東山可晏如

春暮

春盡餘寒衣尚重朝陰黯黯戀芳叢鳥聲渾隔雲山外  
花事全銷風雨中塵累未能遊五嶽宦情曾是薄三公

年來防海催科橫浪說歸田賦最工

送張中丞還蜀

防海年來力已殫一朝談笑靜波瀾  
功成詎免中山謗贈別應嗟蜀道難  
叩闕請租回帝眷磨崖畱頌與民看  
峨眉高處雖堪臥祇恐徵書起謝安

聞報紀事

五樓鐘鼓不聞揚三殿同災特異常  
憑室須頒罪已詔止車應受直臣章  
堯心自是安茨室漢祀何能救栢梁



遙想千官趨走地却於西內拜君王

送范于中楚憲移任東藩

新辭憲節荆襄上更引藩旌齊魯間  
基訪靈光題賦去邑聞絃誦采風還  
虛傳金藥生蓬海無復泥函秘岱山  
長白祠前頻駐馬獨將憂樂係時艱

簡王舍人

閒居為語鳳池賓曾共當年侍紫宸  
五夜趨朝聯劔佩一朝予告謝絲綸  
湖山別業青箱在兵火移家白髮新

獨憶題詩賈中舍歸來誰復嗣陽春

答董子元太學

山居寂寞誰相問海內交遊半不通  
雙鯉將心傳夜月一帷垂老閉春風  
新城聞鶴因兵後往事看花若夢中  
情忝通家生校晚思君惜未見嵇公

詠架上練

疋練高懸素影微魯邦東望是耶非  
漫因龜手求靈藥欲趁纖腰製舞衣  
浣處詎須悲墨翟晴時長似對玄暉

秋風夜報礮聲起誤落空房恨未歸

寄呈孫宗伯於南都

陵山遙帶石城東信是雲霄路莫通紅葉晝題傳妙句  
紫薇晴對憶高風將移相印新提上暫掌綸牋舊陞中  
勿謂散曹忘夙夜漢家典禮二京同

寄劉諫議畿

經年尺素未曾題長夏郊居懶自宜北地塵飛榆塞日  
西京灰滿栢梁時中朝望屬陽司諫左掖吟憐杜拾遺

定有封章回聖主莫須焚草避人知

上巳日盧次桡讌集同周公瑕黃志淳伯氏季氏

作

千里相逢在闔閭坐談長缺氣凌虛曹家見妬因題賦  
梁獄傷心幾上書白骨東連新戰地黃河西遶故山居  
古來俛仰俱陳跡莫惜春風襖飲餘

送淳甫之南都

憐君避難頻為客非是干時謁貴公百畝已荒吳苑上

全家猶寄冶城中  
鶯啼驛路關春意  
帆落津亭候曉風  
年少相看頭易白  
無言江夏是黃童

江淹作恨賦李白擬之余因作恨詩

世事年來與願違  
春深無語對花飛  
曹王座上空陳伎  
襄子橋邊但請衣  
鏡裏顏銷恩寵薄  
牀頭金盡結交稀  
出師未報陰山捷  
身沒沙場竟不歸

吳純叔招遊天池聽講解今為中丞墓

石徑緣源此共攀  
香林深處迥塵寰  
尋遊始訝春將盡

入室何知客到還坐見雨花飛戶外時聞流水響松間  
蓮峯祇合開僧社却笑滕公浪卜山

送陸子還洞庭

竭來城市不堪居歸去湖山得自如林屋樹深無暑到  
石門雲偃覺塵踈歡娛勝事還能幾零落交知大半餘  
借問風帆何日下將因明月遲秋初

答客問

客問當年作帝臣朝儀曾覩內家真佩隨鍾漏趨丹陛

衣染爐香散紫宸一謝仙班那再得將談盛事已難陳  
容華未盡恩先盡回首鶯花夢裏春

秋日莫憲副以寄懷之作書扇見貽賦答

經年林臥無芳訊一雁雲間每致書禾黍總荒新戰地  
蓬蒿猶滿舊幽居瓊枝想見勞顏色紈扇題將慰穆如  
潘岳平生惟用拙相如誰得似長輿

答施平叔寄示詩刻

解官聊得遂吾初華省榮名並是虛遙憶峴山同調客

每從茗水悵離居  
兵戈亂後音書少  
零落平生故舊疎  
展誦新編懷往事  
萍踪一散十年餘

寄寇體乾方伯

與君結綬分畿縣  
並是看花年少時  
闕下鳬迎仙令舄  
省中鴉散尚書期  
別來歲月空陳跡  
悵望雲山幾夢思  
何事越邦頻得借  
西湖應起寇公祠

哭趙司空

同時奏賦謁承明  
中歲論交嘆死生  
晞世有才非善用



道家為將忌功成忽看馬鬣新開塚愁說燕然舊勒銘  
烽火祇今東海上幾多人哭趙營平

送王甥受福重謁相府作

歸來貧賤幸相隨何事韓生復別離供奉憑將三世術  
遨遊仍戀五陵私慣諳客路如平地祇恐人情異昔時  
記得燕公會誤采省堂應見舊題詩

贈黃侍御中北上

君王遙待侍臣回況御陽春左箇開早為乘驄仙闕去

猶煩羅雀翟門來盤飧獻歲聊傳菜驛路輕寒已見梅  
一自南中持憲後至今六詔想風裁

贈蔡子木

林間車馬不相聞說却長安隔世氛何事故人成白首  
猶看羈宦在青雲重開火樹因畱客乍熟春醪若待君  
莫問平生詩思苦一從身隱更焉文

送唐應德視軍海上

玉關此去朔風寒瀚海東來血未乾曾謂軍容非俎豆

憑將經術靜波瀾邊情已向帷中決師過還須席上安  
借問王章舊時友幾人相慶貢公冠

長兄祥日悲賦

歡娛舊事不堪論細雨空堂倍愴神三徑落花誰是主  
一丘荒草已為陳因來上食登君座索盡遺書斷客輪  
愁見梁間新燕語可能飛喚夜臺春

將有章江之行書懷

棄置何言宦不工逍遙只合臥江東仍遊遠道傷心外

却覽方輿指掌中  
給札蘭臺存盛事  
投書相府媿嵇公  
老年懶賦滕王閣  
錯笑時來欲趁風

一村叟

傍村新卜小齋成  
坐對門前春水生  
雨過西山多爽氣  
日長高樹有啼鶯  
香醪隨意遺隣舍  
車馬無喧遠市城  
何事明時有好隱  
古來丘壑本同情

尹山畱別子約

野寺維舟日未曛  
越江從此路初分  
酒酣南浦聞驪唱

夢遠西堂憶鴈羣  
草閣呈秋來爽氣  
石床過雨絕塵氛  
青山堪臥那堪別  
祇自將心媿白雲

重經西湖

西湖原是舊離宮  
烽火那堪四望通  
山邑重開圖畫裏  
年華猶在夢魂中  
沙閒鷗鳥心相得  
水冷芙蓉跡頗同  
多少遊人爭解說  
歡歌畱却使君功

胡開府招讌太虛樓

吳山高處謁氤氲  
幽閣晴開一逕分  
嘯倚樓臺逢越石

心懸廊廟見希文湖中風景平堪攬海上煙波靜不聞  
樽俎勝遊戎事簡揮戈直欲駐斜曛

謁鈐麓書院

秀江東注遶鈐岡曾是崧高生甫鄉雕拱龍盤瞻賜閣  
垂溪虹飲訝飛梁年年身隔丹霄迥日日門流慶澤長  
總說平泉花石麗何如此地沐恩光

別何中丞遷

獨攜書劍客南州早見章江樹色秋閣上題詩思帝子

門前修刺謁君侯亦知地隔猶風馬忽漫星分在斗牛  
徐孺才名誰得似無煩解榻欲相畱

錢江夕泛舟人因指括蒼感賦

冬霽寒輕樹未彫丹楓江岸似花饒半帆布影懸初月  
幾處漁燈點落潮漫世不將辭賦賣端居何用簡書招  
白雲東望蒼山路曾記當年誤折腰

送日者朱氏

逢君布卦似公明盡道朱家有建平獨坐垂簾聊著易

人來叩戶已知名吳中再至還輕組洛下相招果卻兵  
為愛隱居何處是澄江一曲對宣城

寄呂光祿

聞買山莊天姥連千峰紫翠一窻前陪京散署聊堪寄  
光祿司勳是右遷勝事暫將圖畫檢音徽近有尺書傳  
年來太白東遊興鄉夢時從剡水懸

皇甫司勳集卷二十九



欽定四庫全書

皇甫司勳集卷三十

明 皇甫汈 撰

七言律詩

苦熱行

西來赤坂途猶阻南望炎州井尚融  
水戲欲浮三翼舸從遊曾侍九成宮  
閒揮濁酒臨池上仰視明星起夜中  
惟有玄思除熱惱美人何處惠清風

訪史恭甫於銅官山中

仙潭如鏡不飛塵  
花逕深藏洞壑春  
靈運鑿山因作主  
鄭莊置驛遠通賓  
新題殿角懸金額  
舊倚窓扉化玉人  
聞道太常方禁酒  
步虛聲裏夜朝真

王守遊越

仙帆遙指武陵西  
幕府年來靜鼓鼙  
行縣雙旌勞省飲  
向山五馬任攀躋  
湖波已覺秋風颯  
烽火猶憐芳草萋  
常守郡齊多勝事  
六橋何用羨蘇堤

送范進士勞軍還朝

早從劒佩接仙班，遙捧絲綸出漢闕。  
解橐盡頒兵士賞，棄繻爭識使君還。  
鴻飛冀北春前信，桂發淮南別後攀。  
兄弟才名誰得似，古來二陸自雲間。

九日邀郡守吳山登高

西歷郡峰到上頭，諸天下瞰五湖流。  
常郎治郡多公暇，白傅耽山況屬秋。  
黃菊紫萸開勝會，朱幡皂蓋引仙騶。  
古來風景褰帷處，非是尋常落帽遊。

王祿之同年六十予少三歲而同產八月聊託青  
山之隱相要白首之期

同時謁帝起攀麟早見為郎慶此身介壽喜輪新甲子  
養生剛遇是庚申右丞覓句多超悟內史攻書已逼真  
秋入香山堪結社幾迴花下特相親

冬日邀蘇若川同黃張二子小集草堂

竹徑寒扉掩白雲漫延三益啟斜曛歸來海內空馳譽  
相見江東好論文酒惜公榮畱獨醒花憐陶令贈餘芬

眉山草木今何似猶道彫零半為君

至後子約第招燕作

同時辭宦伴閒居却羨連枝鵲繞餘隙裏年華那可駐  
林間風物已堪書東山絲竹何須廢北海尊罍亦未踈  
莫訝日長纔一線春光漸喜到吾廬

庚申除夕寄兒楸

雨堂燈火夜深時試頌椒花更舉卮陽氣漸迴知歲改  
寒陰不散為春遲尚生婚嫁猶嬰念平子愁吟未遣思

借問長安芳草色遊人何事忘歸期

虎丘

名山近接闔城西春雨才收水滿溪  
幾處笙歌成懺悔一林桃柳當菩提  
池邊試劍看虹起石上談經聽鳥啼  
莫道空門常習靜麗人無日不攀躋

送張幼于北上

東京養士弘開館西解憐君別寓居  
經折高談掌故後詩成新體建安餘  
暫修孔相門前刺定得中郎座上書

獨有鄉心千里共淮南秋水報雙魚

聞報

已報旱雲連薊北更看洪水漲江東天高未鑒桑林禱  
河決難成瓠子功周制備荒儲九載漢家聞異策三公  
小臣亦願輸餘稅却奈歸田歲不豐

送范觀察再入滇中

逢君造次將何適猶指南雲戒使車萬里盤江重到後  
五華諸寺舊遊餘跼鵲望處曾題字候鴈來時好寄書

若問當年同宦者為言辭賦老相如

送王佖北上

將為其先  
公請道典

十年歸與白雲期一棹重來問所之物色定逢關吏識  
姓名猶有侍臣知花開可是揚州興木落兼多秋水思  
若說先朝舊供奉君王應恨不同時

無題

溪通菖水倩芙蓉路似巫山定幾重按出新聲驚麗曲  
粧成半額儼花容庾公老興原非淺籍孺柔情未是濃



底恨別離翻太促願教魂夢得相依

壬戌元日

律轉殘年已報春開正倍覺物華新門前楊柳同元亮  
谷口鶯花待子真容鬢祇應驚馬齒夢魂誰復問雞人  
古來但願生堯世長守箕山幸此身

春雪

春寒何自入羅帷雪滿朝園起更遲朱郎從遊衣濕夜  
公車待詔履穿時休論往事傷心素祇為流年惜鬢絲

最是謝家才善擬將同柳絮恨風吹

讀梁比部集寄悼

人生夢幻千年促惜爾才華六代兼曾是多愁吟宋玉  
可勝長恨賦江淹故居寂寂門應掩新塚累累土乍添  
不見茂陵求草去名山空自闕遺籤

燈夕試舞奉酬何孔目

如花檢得舞教成乍遣春宵按曲聲長袖翻嫌垂手捷  
短簪猶怯貼腰輕鮫人絲綴千燈艷雲舞屏遮四座傾

觀罷麗詞誰獨就箇中何遜最知名

水部有詠舞詩

五日書懷

麥風吹雨晝漫漫信是江城五月寒病起入山思採藥  
客來開筵強簪冠銷兵何用靈符厭續命須縈臂縷寬  
篋內舊蒙宮扇賜祗應畱作姘好看

贈何侍御

古來崧嶽誕生申西望雲巖信有神暉映晝逢衣繡客  
動搖時見避驄人封章滿積臺中草抗志深埋都下輪

吳國遺風將欲采對君祇恐不堪陳

嚴公解相還豫章追送淞陵作三首

古來開閣自平津幾見功成得奉身  
逸老特蒙優詔賜乞骸何用屢書陳  
東都飲餞辭供帳南驛乘符速去輪  
歸到宜春酒應熟散金惟欲會鄉人

明時扈聖廿年餘始得銜恩謝直廬  
秀水池臺非舊築鈴岡花徑是新除  
縣家歲給山公粟門巷高懸薛氏車  
舟泊吳江秋乍冷野人聊為獻鱸魚

今時元相古疑丞宿德朝中久見稱暫免豈淹安石臥  
再來應就潞公徵艦陳兵衛遙張幟邑奉郊勞夜舉燈  
若訪西湖舊遊寺休將玉帶棄山僧

春日酬子約

喜看春日入新年老大逢時倍自憐綵筆頌椒稱勝事  
彫盤行菜慶初筵寒堂積雪消難盡踈柳輕烟散未全  
獨有審言詩早就漫將愁思寄春先

春日書懷

憶昔承恩遊宦時上林春色總相宜  
歸鴉已遶棲枝戀老驪何因伏櫪悲  
南國鶯花非壯日東山尊酒是佳期  
長安紙價今騰否猶是人傳水部詩

春杪期子約山遊

閉關棲病百無營春暮惟兼風雨聲  
抗世祇應稱傲吏少年曾亦喚狂生  
長辭爵服從吾好靜對鶯花見物情  
兄弟古來成二隱西山堪作採薇行

答匡南王孫

虛左歸來歲月侵，侯嬴猶感結交心。  
洪都客散滕王閣，白社誰招慧遠林。  
樂善一春願玉體，題詩千里惠瑤音。  
忘憂柳色今何似，攀折東風恨不禁。

送鄭比部文茂還朝

余場中所取士也

奉使遙看出漢庭，平反今已報無刑。  
冤銷旱海霑靈雨，恩到圓扉仰法星。  
雅志自應弘遠業，少年誰不羨明經。  
春風正好桃花發，奈贈離枝楊柳青。

余遭兵變諸君携具慰勞小集團亭作

先人敝宅近成墟別業猶存三畝餘竹下酒饋勞客載  
花間門徑擬親除但令沉飲深衷見莫遣交情病裏踈  
減穀亡羊均是累可須重問士安書

癸亥除夕

生年六十經除夕獻歲重逢甲子春臺內昔叨清憲使  
社中今數白頭人競裁綵勝祈多福早辦椒盤頌五辛  
陶令還家無長物門前惟見柳條新

早春漫興



春遲今歲因逢閨獨往尋春春望賒日午陰崖初散雪  
夜深微雨乍催花星橋已見收燈市山郭頻聞覓酒家  
自是金閭嘉麗地不緣兵火減繁華

寄許仲貽同年

冰泮雙魚達帝鄉題書一為問行藏山中歲月相思久  
海上烽烟涕淚長縱酒偶忘隣媼舍看花曾記少年場  
五陵車馬多豪貴每過城南避子將

余昔作恨詩今復作別詩

蕩子年來輕遠行  
河梁那復念閨情  
月明夜識昭關戍  
風急寒流易水聲  
不見紫騮還玉塞  
尚聞黃鵠餞金城  
傷心獨有隋堤柳  
折盡長條却更生

答真陽周紹稷

楊太史門人也狂記兼  
示所刻楊子行戍稿

滇徼辭官老更休  
河陽試宰仕初優  
春前剖鯉傳書至  
天上乘鳧佇鳥遊  
想見儀容勞北海  
猶聞涕淚灑西州  
茂陵遺草君收取  
他日應逢使者求

追悼白貞甫索其遺文

主客風流數樂天  
儀曹清暇儼如仙  
彈冠共記趨朝日  
撒瑟俄驚歎逝年  
長吉囊詩空自秘  
中郎抱論與誰傳  
他時漢使如相訪  
祇恐文姬誦未全

史子示袁州詩亦賦

聞君獨抱感時心  
說却袁州恨不禁  
華屋春寒無處燕  
沙隄日暮只啼禽  
尚思禍起驂乘晚  
猶道恩過賜劍深  
詩報茂陵堪下淚  
莫將吟入雍門琴

劉守遊白嶽時傳婺源之警奉訊

山標白嶽與雲齊江抱新安一水西獨往振衣朝闕闕  
遙瞻飛蓋躡丹梯情憐花鳥春堪賞興發烟霞句每題  
仙吏暫遊非避世桃源何事使人迷

送張給事潘府冊封還朝

手持漢節奉恩輝為展周親出禁闥向夕每思青瑣拜  
乘春遙望赤墀歸小山桂樹畱難住上黨揚花別易飛  
總有封章焚草盡醴筵休問諫書稀

王百穀示余半偈齋詩因荅

齋題半偈學維摩  
楊對蕉陰勝碧蘿  
已辦焚香耽寂坐  
無煩載酒問奇過  
啼殘好鳥春忘却  
落盡靈花夜若何  
為訝右丞傳妙句  
祇緣詩思入禪多

送范憲副之魯  
枯蒼人也余昔治其郡

杜門忘却人間世  
掃徑重迴長者車  
芳草客程聊信宿  
白雲官舍近何如  
觀風東去聞絃誦  
報政南來待簡書  
莫道外臺非禁地  
霜威猶是避驄餘

雨中書抱

一春風雨落花稠長日園林坐自幽北海以才蒙謗缺  
東京何事恨清流欲除煩惱空塵劫并悟逍遙是浪遊  
莫學虞卿頻著作書成猶未解窮愁

王元美讀張幼于紈綺集贈之以詩余亦嗣作  
阿士題詩自綺年新將珠玉綴成編共言體出西京後  
更道聲從大厯前池上詠鵝思不假席間賦犬句爭傳  
同心一見能嗟賞可是王融得我先

訪白儀曹夜遊園亭

當時移宅過江東  
早歲為園象洛中  
歸謝玉階年不待  
夢疑金谷路遙通  
遊看花石存先業  
坐偶琴書見父風  
曾是竹林沉飲客  
夜經墟下憶嵇公

無題

自昔仙姝誤落塵  
愁中翻怯靜中因  
吟成桃葉空畱恨  
別去楊花可耐春  
每過舊遊追以慨  
憑誰顧曲聽其真  
寄言宋玉非耽色  
莫道猶多美婦人

九日結客湖山登高  
悵無懼悵漫不成詠  
章憲副

以詩惠訊賦此解嘲

湖山風景控長洲不減龍山九日秋  
香梵林中居士社笙歌塘上美人舟  
自憐白髮身猶健欲詠黃花思未酬  
羨爾閉門能覓句臥遊玄想勝來遊

王子往會稽展袁相公墓因有此贈

平津高閣已成秋一道寒泉萬木秋  
秘器盡頒遺寵在樵蘇特禁故恩留  
碑題黃絹門人撰草積青箱漢使收  
非是羊曇行暫誤欲將雙涕洒西州



送劉守備兵維揚

建牙吹角海門東，盡道劉琨節制雄。  
時聽高談樽俎上，夜聞清嘯戍樓中。  
已多遺愛留棠樹，別有幽情倚桂叢。  
咫尺江流纔一水，音徽猶得奉餘風。

莫憲使補官楚臬繼參梁岳奉贈

聞道除書下紫宸，滄江猿鶴戀征輪。  
共憐潘令閒居久，可訝山公薦啓頻。  
湘浦蘭芳遠贈遠，河陽花色待行春。  
漢廷典禮須君草，詎作梁園授簡人。

臘月十二日邀顧給舍張太史吳山人張孝廉小

集張燈戲曰此隔歲元宵也山人賦詩余因奉

答

今冬因閨得春先已覺陽和入舊年銀燭東將消永夜  
華燈試取照初筵月乘珠彩宜爭艷雪映瑤暉似闌妍  
不是高才逢季重南皮勝事與誰傳

赤城山房諸子賞雪不赴

吳城無處不飛花別有城南眺更賒水遶橫塘成素練

臺臨茂苑盡瑤華殘暉似逐將軍騎寒影猶棲御史鴉  
可是梁園辭賦手爭言抱玉已家家

宋憲使見訪之閩

曾記腰章宰邑年忽看持節下江天種成桃樹畱遺澤  
折取梅花贈別筵橫海樓船聊自泛悲秋辭賦有人傳  
閩中為報烽烟息前席行當賜召還

皇甫司勳集卷三十

欽定四庫全書

皇甫司勳集卷三十一

明 皇甫汈 撰

五言絕句

四月晦同吳純叔憇劉氏園亭各賦以花下一壺

酒為韻五首

萼萼葵方朶娟娟榴亦葩  
不是河陽尹那應縣有花  
薄領不知春園亭忽逢夏  
幸有盈尊酒與君醉花下

執熱就東臯陶然坐西日無言會不常所願心相一  
林深堪駐馬鳥宿不驚鳬坐遣花間月慙慙上玉壺  
江南千里心極北一回首感茲水上萍忍負杯中酒

桃花塢三首

為沈霍  
州瑩作

龍門萬年樹潘縣一叢花多少迷津客皆因戀物華  
生長桃花塢不識桃花樹試問玄都人已春光暮  
卜地聊棲趾成谿自不言抵疑闔闔裏遙接武陵源

詠燕

來似隨鶯侶歸應却鴈行為問東隣社何如王謝堂  
有所思

魂去何須夢情來即是思非緣悵茲夜翻似恨當時  
十六日對雨

夜月當空滿朝雲送雨來陰晴能復幾并遣歲華催  
雨館鳴琴和子約

迴飈送雨來歲暮寒雲起鳴絃雜散絲隔坐聞流水  
臘月十五夜月和子約

清光十五度此度倍堪憐再滿應同夜重看却異年

二月十五夜子浚兄燈讌再賦

再吐金枝焰重開玉樹花非闕耽夜飲直是眷年華  
彩縷交花艷明珠減月輝君能畱顧盼時得奉芳菲

送周以言再入越中二首

湖山重到日風景悵當時越客清江上猶吟弔鄂詩  
日落西陵渡秋來烟草萋已無孔九在誰問若耶溪  
賦得有所思



錦席承君讌青樓寄妾家無因挽紅袖畱恨與桃花

謝璇公惠藥

文園多病日蕭寺客居時未得無生理持方問藥師

西天寺

傍即號國墓

彌勒禪林雨將軍隴樹烟長安今罷笑畱恨向西天

能仁廢寺

殘雨鳴秋殿寒蕪翳夕廊老僧諳寂滅何處解荒涼

過句曲劉生

家鄰西晉寺門對大茅峯劉向傳經處空齋落夜鐘

偶述

惴惴懷隱憂咄咄嗟異事端誦陽生言千載同心契

陽尼

云我昔未仕不曾羨人今日失官  
與本何異然非吾宿志命也如何

張比部園翫仙掌蛺蝶花二首

碧葉仙人掌清秋甘露擎文園方病渴願爾賜金莖

蛺蝶幻花叢因風自飛舞移將漆園中夢寐同栩栩

題美人蕉

帶雨紅粧濕迎風翠袖翻欲知心不卷遲暮獨無言

寄侍二首

遇花思舞夜覩柳憶顰時可道錢江上行雲有夢知  
家住吳趨市書傳越踐城病來因染色魂去為鍾情  
過潛山寄嘲卜令自無錫遷此

商也能為政明時尚棘棲萬公憲岫色何似對梁溪  
桃川宮

昔為避世鄉今是朝宗路桃花春水間猶是尋源誤

蘇黃渡東坡山谷經行處

劉阮中路蘇黃渡口津不知之楚客何似避秦人

響水關

飛泉來斷壑聲咽不堪流何以函關客遙心寄隴頭

友竹居

扶疎北窓下坐處挹清芬為問延三益何如對此君

綠陰軒

嘉樹壓繁陰流芳閱荏苒念昔植者勞願言畱勿翦

呂合

昔人自羽化枯骨尚安存青塚藏金藥難招緱嶺魂

郡學八景

地本宋相居宮由素王闢嘉樹既敷榮澄流復凝碧

右南園

仞由寸乃積高以下為基攀躋一延眺仰止良在斯

右道山

壁水湛園流金波漾清沚中有遊魚戲荷香隨風起

右泮池

瑤壇茂文杏得地歲華深時有青衿子橫經坐晚陰

右杏壇

託根上千霄偃蓋久承露不念植者勞但知匠者顧

右古檜

仙源渺何處鏡接太湖長奇峰七十二隱隱在危梁

右來秀橋

言采泮水芹因登道山岸斜日抱亭扉春風集童冠

右采芹亭

條風將化雨一夕灑南園門下多桃李芳菲總不言

右春雨亭

梅花水仙

弄影俱宜水飄香不辨風霓裳承舞處長在月明中

題桃花園

粲粲先春綺盈盈媚晚粧回思少年日騎馬出河陽

題茉莉二首

萼密聊承葉藤輕易遶枝素華堪飾髮爭趨晚粧時  
香慣臨風細花偏映日生若將人試擬小玉定齊名

題牡丹

一種天香異千株國色傾應憐花似臉半醉倚華清

哀葛姬

姬號曉雲本出教坊雅善琵琶兼通翰墨尤工  
於寫蘭一朝化去遺蹟猶存

忽聞藏夜壑非復遶陽臺何似行雲意猶堪入夢來



妙手能操管芳心解贈蘭香魂隨宿草祇作斷腸看

經龍虎山訪裴法師墓

草宿青山寂松林白日寒丹成人已化猶自閉空棺

其二

海上遊梅福吳門更不歸仙源流夜壑何處有花飛

師本吾蘇人

六言 附

泊江口

大別山前暮雨漢陽江口孤舟祇自臨流送酒無因挽

日登樓

皇甫司勳集卷三十一

欽定四庫全書

皇甫司勳集卷三十二

明 皇甫汈 撰

七言絕句

塞上曲三首

山城落日照居庸  
抗嶺迴巒紫翠重  
十月邊關塵不起  
萬年陵寢霧常封

居庸關

復有黃花高挿天  
烽火不動龍庭烟  
豈為王公會設險

亦知將士會憂邊

黃花鎮

峨嵋山塞倚雲霄健馬彎弓意氣驕夜半忽聞驚客汗

軍中應識有嫖姚

峨嵋塞

郊上暖行

經旬病臥寒翻劇忽漫郊行暖太舒豈謂陽和猶擇地  
容光不照子雲居

寄王定州

秋日遙思春別君花飛不見鴈來羣風流刺史渾無事

坐對浮圖弄彩雲

閨怨二首

妾自當年遠嫁君  
相隨萬里莫離分  
那能割斷東南水  
化作同飛西北雲

別時圓月照江天  
不見人歸見月圓  
那因得並清光轉  
夜渡梅花到爾邊

五花殿

在邢州寺僧云先為塔後傾圮  
餘趾作殿形五角故曰五花云

浮圖曾記當年建  
七殿盤空標彩霞  
金輪豈合為傾圮

寶殿空餘散五花

再宴徐公子第

花前月影搖雙闕樓上香塵淨六街公子金盤畱客醉  
夜深寶馬過秦淮

晚經西湖

玉殿空山啼暮鴉錦帆秋水悵蒹葭自是西湖好風月  
無人道有洛陽花

江南曲

南國新聲妙入神  
臨岐一曲可憐人  
為向四時歌子夜  
也應白雪和陽春

雨霽過江

六月江門雨乍迴  
孤帆帶雨晚微開  
潮聲半逐雷聲去  
山氣全銜雲氣來

月下聞琵琶笙簫各賦一首

朱絃斜抱月明中  
翠袖輕調半逐風  
一曲關山無限恨  
相思猶自到離宮

月映霜華夜最清  
鳳簫吹出斷腸聲  
却憐楚客浮湘意  
不似蕭郎弄玉情

月落吳宮夜欲分  
笙歌一曲不堪聞  
凡心也解非仙骨  
漫說乘鸞向彩雲

鄱陽湖三首

長湖落日起悲風  
想像旌旗在眼中  
自惜空流賈生涕  
即今誰數亞夫功

君王愛第本難圖  
夜半樓船直渡湖  
金谷翻冤墜樓婦



銅山虛聚鑄錢徒

書生曾未解談戎  
帝子相招意氣雄  
不見飛舞來闕下  
猶聞染翰在舟中

寄蔡子木

越山高並吳山接  
漢水流兼江水長  
聞道衡陽有飛鴈  
將詩遙為達中郎

梅子鋪題壁

月明清露下荒臺  
木落空山更可哀  
夜壑常留金碗在

春風曾識翠華來

羲之墨沼

芳沼清泉不斷流  
右軍遺墨宛然留  
何時得暇來臨帖  
為寫經文道士收

陸羽泉茶

蓮宮幽處涌清泉  
茶竈年深冷綠烟  
香供尚存龍藏裏  
試嘗何似虎丘前

再過安國寺

古寺蘇君昔每臨焚香端坐念何深笑余經歲才重至  
臺榭荒涼祇茂林

留別定惠院僧

一自齊安遠寄家不曾來賞海棠花高軒落日聊孤坐  
猶記山僧夜送茶

留別赤壁山僧

赤壁磯頭月可哀山僧常笑使君來秣陵城外清秋夜  
悵望江雲隔楚臺

金少卿集卷三十二  
寄故園兄弟

春風茂苑棠花發  
夜月湘江鴈影迴  
康樂題詩勞夢寐  
平原羈宦不歸來

寒夜曲四首和子安兄

風吹芳樹已凋殘  
却放清暉入畫闌  
莫道金閨常自煖  
夜深翻似玉門寒

淡烟和月出霜林  
落盡寒花只素陰  
別有蘭缸凝彩焰  
鏡臺斜倚照冰心

繡戶深沉半掩門，玉窓愁對月黃昏。  
閒垂翠帳何曾寐，熏盡金籠總不溫。

年隨流水去，傷神催入風光一度新。  
何事蛾眉顰不展，王顏無伴怕逢春。

寄吳醫隱殊勝寺二首

聞爾禪房結隱居，齋心終日對真如。  
常明萬葉青蓮火，為照窓前五色書。

宛轉金河接上池，祇園亦有杏花枝。  
門前自施迷方藥，

何用長安市裏知

吳鄉除夜歌三首

蘭燭流光照綺筵  
椒盤傾酒度華年  
漢庭白首何曾調  
莫恠揚雄學草玄

久宦空嗟江海身  
故園今見歲華新  
吳宮柳色寒烟裏  
不及長安易作春

荏苒流年去不迴  
夜深鐘鼓莫相催  
金樽放飲香醪盡  
但遣春光醉裏來

吳江夜泊有感

日洛吳江霜氣清  
越鄉烟樹眼中明  
虛傳八月乘槎去  
不似當年奉使情

江上停舟繫水楊  
伴人鷗鳥自成行  
驚心一夕遙千里  
不獨秋深恨漏長

十四夜雪後對月

瓊枝斜掛玉輪秋  
積素承暉淨不流  
誰憐寂寞惟僵臥  
猶自更深一倚樓

冬日聞懋上人入西山寄贈

支遁西行欲買山  
乘杯一去幾時還  
禪心不係湖雲似  
却戀晴峰縹緲間

雪後書懷

西風吹雪滿柴間  
坐對寒雲意泊如  
自笑曾為穿履客  
長安愁說待公車

病腹承子約第以導引方見示

經笥深慚邊氏腹  
文園空臥子雲身  
秘方為謝傳鴻苑



端坐寧辭學鳥申

臘月十五夜待月

雪意含雲夜不分  
桂華搖落在氤氲  
羅帷歲晚無須鑒  
獨有關山最憶君

冬月沉輪空夜闌  
綺窓華燭自凝寒  
春來依舊清光滿  
只恐催人不耐看

聞蟬

衛水東馳疾似雲  
水邊沙柳帶斜曛  
最是蟬聲不堪聽

西來況是客中聞

施子持冊索書近體喜綴二首

漢庭儒術有施讐終歲談經了不休  
把手青門何以贈  
但言筆札欲相畱

肺病無能藝頗耽不辭畱滞在周南  
新聲近代多爭長  
惟向人間說沈三

對月答子浚兄見懷諸弟之作

南北何如漢二京迢迢吳越兩鄉情  
謝家樓上清秋月

分作關山幾處明

挽張秉道以入覲客死洪州

聞說朝天事已非  
滕王閣畔淚沾衣  
空江寂寞秋尊冷  
張翰何由更憶歸

子安席上漫賦

失路那堪事遠行  
離筵愁殺起新聲  
琵琶總是江州淚  
羌笛都為隴水情

病中聞已兒遊張公洞占寄

名山探盡賦難成臥病江淹減筆精見說靈光將屬草  
童心亦自有高情

病中與賜兒骰子占戲

枕上煩心每自驚祛除不盡苦還生呼兒六博聊相遣  
爪葛須知莫浪爭

東禪寺題張琴師故居

遺民昔日寄東林彈指韶年去復今借問虎溪明月夜  
幾多流水在琴心

古意二首

承恩憐故亦憐新落葉隨風笑此身陌上相逢廝養婦  
宮中曾是舊才人

銅臺遺令不堪悲玉座猶憐歌舞時恠得無情王處仲  
一朝開閣散蛾眉

題董太史卷後

闔閭城外初傾蓋苔雪溪前遠泛舫題詩何日能相訪  
消息應傳董五經

中秋懷舊三首

懷乙酉年也

玉街芳樹奈清秋，明月高懸十二樓。猶記江淹題賦手，

夜深操筆對淮流。

子浚兄有淮清秋月賦

寶馬垂鞭過狹斜，金尊不惜醉琵琶。五陵信是多年少，敦賞何能及謝家。

斗城風物最堪憐，一擲流光二十年。嵇阮同遊無半在，

可禁吹笛落花前。

子安兄與陳徐二子皆已物化矣

丙午生日漫賦二首

華省歸來歲復臨金丹未就二毛侵低眉漫憶從前事  
幾許當杯得快心

生朝不樂亦云痴把酒持螯醉一時王微也解名相累  
抗世安須吏部為

饗史謠二首

金距雄冠喚德禽區區哺卵亦何心瑤盤一薦傾人市  
郭外應愁斷曉音

中官玉食四方來酸笋香螺雜豹胎駐馬一食猶未饜

錦盤明旦候門開

淫史謠二首

穿針少女貌如花  
驄馬過時面半遮  
何緣得赴秦樓約

試著青衣典絳紗

為婦築樓行臺每夜更  
男子衣混執燈者入

暫收寶髻與羅裙  
結束吳兒兩不分  
夜臺中陪御史

朝朝門外候將軍

導之出入者指  
揮張建節也

春夢

二月十  
五夜

玉貌雙傾識未真  
羅幃一夕偶相親  
襄王覺後渾如幻



樂廣生前了是因

詠贈髮二首

寶髻斜安墮馬粧  
偷將鸞剪試分香  
纏君王腕勞相憶  
底是春心如許長

鴉鬢雙盤似楚雲  
聊將一縷贈夫君  
枕邊絲斷情猶繫  
鏡裏香銷恨豈聞

春日許應亨比部見訪因憶應元夔府時有內子  
之戚二首

臥病江鄉世事非  
門前車馬客來稀  
相逢不解蒙莊笑  
猶悼芳容淚滿衣

建節當年入漢京  
離筵子夜總新聲  
扁州再接清河使  
一曲那傳白帝城

長兄新買珠燈試譙二首

的皪明珠綴綵絲  
芬藍華焰引金枝  
爭言南海流光夜  
絕勝西園讓月時

為歡詎惜散黃金  
訝向鮫人購遠環  
但遣履綦承夜色

不緣纓組照春心

舅氏黃汝成悉出所藏秘畫眎余嗟賞久之因賦

三首

寶軸流傳歲代深購時不惜散黃金長康好畫應成癖  
玄晏耽書亦苦淫

海內名山未盡遊渭陽圖畫總能收座間一夕窮千里  
却笑張衡遣四愁

管落雙枝並入神手調花露染來真寄語桓家須愛取

莫將寒具誤留賓

子約第過余書齋值余臥病對桃花賦詩而去作

此奉解

羞將明艷媚芳辰  
閉戶桃花浪作春  
獨立遲回君莫訝  
此中多是解迷人

別彥先舅

江上花飛三月時  
暮雲孤棹欲何之  
不堪相送韓甥意  
猶是微吟顏遠詩

艷珠

明艷今時第一流  
新承恩寵石家樓  
舞腰徑寸朝朝減  
啼淚雙行夜夜愁

聞報三首

太乙祠前禮玉清  
爐烟燈火徹霄明  
賜錦裁為朝斗服  
宮詞按出步虛聲

玉輦離宮駐未回  
金吾夜報栢梁灾  
可憐粉黛成灰燼  
錯指長門是化臺

朝遷玉座已生塵  
夜隔紗羅獨黯神  
可是少君憑幻術  
望中猶得見夫人

送汪子之錫江

桃花落盡草萋萋  
歸去汪倫路不迷  
天際孤帆誰與伴  
祇隨明月下梁溪

覽報二絕

沙塞飛書達漢京  
甘泉烽火徹宵明  
停鑾莫向馮唐問  
頗牧何由得再生

當時丞相稍嫌尊詎是君王亦少恩收骸那見東園器  
泣血空思上蔡門

梁溪詞三首

舞似前溪歌似秦綺羅秋夜不勝春可憐明月能畱客  
却笑桃花解誤人

黃金賣賦買歌聞千載餘名一夕醺恨殺玉顏逢洛水  
幾憑香夢到巫雲

少陵初過四娘家香氣氤氲月色斜別後青樓何處是

門前記取滿溪花

王使君養晦郊居一鹿隨之游因寄

池上揮毫久不聞  
避人獨與鹿為羣  
乘車欲向空山去  
何似王喬駕白雲

過叟瓶蓮二頭

玉露蒹葭秋已深  
晚芳猶自媚幽林  
何如仙子臨湘水  
朱袖雙垂弱不禁

贈楚湘王生



楚客乘舟秋入吳  
貂裘龍劍一身孤  
相逢解說齊安事  
雪滿堂陰尚有無

昔在乙酉歲余游二泉書院  
畱題於壁邵文莊公  
誦而愛之即次答見寄自公下世逮今兩更酉  
矣再過錫山悵然賦此已酉九月二十三日也  
二十年前少小時仲宣曾受蔡邕知松山寂寞泉臺冷  
猶向東陵訪舊詩

梁溪行樂詞二首

花滿梁溪月滿樓客鄉兩度醉清秋百年行樂爭餘幾  
一夕想思可奈愁

曲按新腔詎似前粧成雅態更堪憐羅幃判醉從今夜  
翠帶畱題是隔年

進酒詞

芳情慣向歌前結鬱抱偏從醉後開何事酒乾銜不放  
杯香暗送口脂來

贈金醫

少年學道出長桑，閉戶時窺五色方。  
漢武甘泉初鑄鼎，好將靈藥獻君王。

以獨草一笏蘭芷筆二枝贈別盛二

獨草新傳越國烟，雙蘭並結中山兔。  
此日臨岐特贈君，他時為寫離思賦。

贈桂軒相者

心厭塵喧隱桂叢，猶將物色閱三公。  
長安總是攀花者，多少榮枯在眼中。

七夕二首

畫郎面面圖金粟化塔層層現玉毫  
舍利窓中看宿劫  
梅檀林外聽江濤

鵲橋宛映金河上  
驚嶺遙連銀漢迴  
從思妙諦多慙拙  
為問天孫乞巧來

釋弘伎自關中游蜀山

太華峰前西別秦  
錦江持鉢度餘春  
經冬不散峨眉雪  
一夕輕消面壁人

句曲崇明寺寓眺四首

義和三十六禪林處處香臺悉布金  
歲久荒涼無半在

祇餘危閣鎖秋陰

千佛寺

化城東望接崙峰  
九曲西流匯上容  
洞口欲尋茅氏訣

丹書猶說石函封

妙雲院

七級蓮花插上清  
靈光夜夜玉毫生  
重簷綴鐸聲和梵

不為風吹亦自鳴

四周塔

寶藏宏開自晉年  
金河常見法輪旋  
五千貝葉靈文盡

持得殘經不忍傳

藏經殿

題寺僧唐馬

騷裊曾空冀北羣燕臺買駿久無聞長鳴且就支公櫪  
非是聽經勝策勲

過北川橋舊寓

客舍依然禁籞西女牆淮月古青溪春風為笑堂前燕  
門外何曾識馬蹄

普照寺聽天曉禪師講解

少林飛錫渡江來  
說法城南有舊臺  
貝葉時時松下展  
靈花夜夜雨中開

永興寺散步

帝城西覓古叢林  
萬木寒垂六月陰  
庭下閒花齋後偈  
門前空水定時心

贈徐公子追悼其姪禹量

綺紈公子擁青衫  
身在朱堂慕碧巖  
竹林為問風誰嗣  
猶自傷心說阮咸

贈資上人

白塔山前慧樹叢  
紺樓初化影堂空  
老僧相見諳吳語  
夜就繩床問洽公

贈慶上人

早年銷跡在空門  
寺數南朝此最尊  
莫以無為成淨業  
好將焚誦答明恩

贈漁苔叟

聞君家住舊苔溪  
春水桃花路欲迷  
總為南枝懷越鳥



此身猶在秣陵西

送故友程水部之子下第往毘陵謁唐太史乞誌

二首

落落雞羣見爾時  
河山猶邈故人思  
叔敖死後空囊在

廉吏年來詎可為

鳳毛今日喜逢君  
裘敝長安路忍分  
最是中郎知有道  
西行一為訪碑文

安平元夕對閨客作

邑少絃歌惟戍鼓村無烟火只漁燈吳趨綵艷閩珠燦  
一樣思歸兩未能

御堤柳

御堤新柳碧毵毵  
霧垂烟總不堪借問道傍車馬客  
幾多離思在江南

寓京感事五首

亡命當年為報讐  
自矜驍勇薦邊州  
持刀白日橫行市  
縣令低眉不敢收

園城高築備遼西夫壻蒙徵事鼓鼙誰向月明啼玉筋  
斷腸知是杞梁妻

紅顏薄命古來聞萬里辭鄉雁失羣不見黃金歸蔡琰  
祇畱青塚從昭君

海陵儲粟號常盈一夕咸陽烽火驚聞道催逋朝遣使  
幾多民命在春耕

甲第西衢曜日新沙堤東巷已銷塵門前行馬依然在  
問姓多非舊主人

送僧之楚

千里雲隨一錫孤  
楚山深處是荆巫  
湘江秋盡多蘭芷  
笑採幽芳當折蘆

謝王子惠蓮房

金房出水訝分甘  
玉沼清秋露半含  
雲樹幾重迷魏北  
蓮歌一曲想江南

訪許子工部舊寮

一別都城過十霜  
相看俱是水曹郎  
到門不敢驅車騎

羅雀應慚見子將

謝惠涼巾

誰製雲巾蟬翼輕  
況逢新沐晚涼生  
北窓高枕承嘉惠  
東省彈冠異昔情

謝王比部惠珠枕

雙蟠綵鳳結明珠  
角枕從來絮不如  
夢魂恍度鮫人室  
願借餘光照寶書

戲調李子喪內三首

君家賢內友人知自是蘭芳不待時莫訝潘生頭白盡  
祇緣新草悼亡辭

月冷粧臺翠冷鈿花銷紅粉柳銷烟陸機總謂多文藻  
可復揮毫示彥先

遺挂凝塵尚黯香洞房深鎖夜何長解愁莫漫頻傾酒  
猶恐卿卿恨太常

馮公嶺觀道傍花愛而賦之

馮嶺秋高鎖白雲四山晴樹挂清氛花開五色多奇品

不植名園便莫聞

春江雪泛柬陳廣文

春日江頭雪作花  
片帆乘雪下東嘉  
雲深不辨袁安宅  
獨擁寒衾到日斜

芝田憶殷近夫

當年仙令下車時  
燕坐鳴琴有所思  
不知葉縣丹成後  
尚見河陽花滿枝

張銀臺避兵湖上三首

青海揚波白日低  
玉山雲樹已全迷  
少陵避亂花溪裏  
却指湖東作瀼西

黃巾夜逐馬鞍東  
華屋朝隨一牖空  
但使有橋容博望  
不將無宅笑張融

婁闢兵後市成墟  
何似咸陽烽火餘  
不見問奇門外客  
啼鴉知是草玄居

寇至雜詩四首長兄命予同作

將軍喪馬懊無顏  
奮臂宵馳敵壘間  
何似賈生行却去



獨騎南部紫騮還

廝卒李阿旺

拔戟先驅獲必雙日高腥血染婁江齊師三百稱驍勇

氣奪吳兒欲樹降

義勇關壽

江邊結網為求魚誰道漁人亦獻俘要取銀牌將換酒

凱聲乘醉入吳歆

漁人顧五

年少輕生不畏擒笑談紿虜未輸心朝來匹馬危城外

提首轅門索賜金

狼兵王五

將入滇折蘭贈吳二純叔

海上塵吹阻盍簪宣遊會共楚江潭贈蘭何似攀楊柳  
佩取芳心報日南

題楓香驛亭子

秋入楓林霜葉零勞勞吳楚此孤亭階前湖水環雙碧  
檻外廬山送遠青

臨江驛中秋

驛路臨江接漢陰洞庭秋氣轉蕭森吳關一望三千里  
為借清光寄遠心

華容

湘江西下見華容路訪桃源尚幾重  
巴水漲時迷蜀道楚雲深處是巫峰

馬鞍嶺

石磴千盤上馬鞍始知鳥道未為難  
此身已作圖南翼猶指雲霄向北看

苕溪邑鐘鼓洞有伯安題石

石傍空山聲暗傳雲和清響落鈞天  
洞門一自題詩後

常見停車叩水邊

沅江

霜落丹楓吹白蘋  
沅湘十月暖於春  
閒將棋子敲燈夜  
可念江干待渡人

寄憶

江東烽火已難知  
亂後邨堪更別離  
總有鄉書傳驛使  
開緘不省是何時

盤江詞三首

白澗流殘青嶂開  
雞公嶺帶夕陽來  
更聞江水盤千曲  
何似愁腸日九迴

攢峰夾岸若雲稠  
下有飛泉一線流  
春草深時多瘴厲  
行文駐馬不堪愁

松風萬壑引盤渦  
聞唱公無此渡河  
漢將西征遺壘在  
至今啼血染滄波

過定西嶺寄憶包侍御節

兄弟逢時早策勲  
人言柱下有機雲  
清宵為問華亭鶴

瘴嶺驄還幾度聞

仙羊山

廣通李令告予縣西有山望其雲起如驅羣羊山下有鑛殆金銀氣也

昔聞浮雲變蒼狗  
茲傳靈氣成青羊  
安得坐逢勾漏令  
閒煮丹砂白日長

捨資驛有楊太史垂柳篇書於壁因寄

垂柳年年陌上春  
題詩不見倚樓人  
萍踪恨殺巴江遠  
望入峨眉翠轉輦

安寧乃楊太史客居處樂人多按其詞被之管絃

曹植疑神賦奈何徐陵新體麗情多爭如供奉清平調  
翻入南中子夜歌

發滇口占

嵇生慢與世相違金馬關前欲拂衣自笑此身猶社燕  
一逢春色便南飛

岳陽道中積雨

千樹松杉結曉陰征夫前路畏泥深慣是楚天能作雨  
却憐吳客坐傷心

黃梅聞張令先已入省

仙鳬謁帝楚江歸芳草洲連赤壁磯遙對雙峰懷玉樹  
琴聲寂寂落花稀

潛山道中五日

客行仲夏逢佳節地近東吳即故鄉思欲避兵猶寇亂  
蓬心那解醉蒲觴

皇甫司勳集卷三十二